

Istitut Cultural Ladin a radunanza

Anché domesdi te Museo vegn portà dant ativitèdes, neva endesfides e problemes de l'istituzion culturèla de Fascia e dò te Ciasa de Paussa vegn prejentà l nef Calandèr Ladin

Cultura e sozietà - Anché vender ai 15 de dezember da les 3 domesdi l'Istitut Cultural Ladin, con si Consei de Aministrazion e la Comiscion Culturala, endrea desche ogne an la Radunanza Generèla te la Sala Heilmann del Museo Ladin de Fascia a Sèn Jan, per prejentèr la ativitèdes fates, i resultat arjone tel cors del 2017 e i projec per l'an che vegn.

Tel cors de la scontrèda vegnarà prejentà l n. 41 de "Mondo Ladino", fresch de stampa, che tol ite na lingia de contribuc dedicè al ladin: con tesè e testimonianzes che se pel adertura ence "scutèr sù" online, de gra a la "Mediateca ladina", strument metù ensema da l'Istitut Ladin per dèr l met de poder apede sori a tesè, filmac, cianties e conties da anché e da zacan. Na ocasion per fèr na reflexion sul ladin fascian, che de segur anchecondi no é san e inton.

Se dajarà cont amò apede ence di projec de enrescida che vegn portà

inant sul lengaz (Vol.F, Vocabolar Ladin Fascian), su la storia e su la cultura ladina, e ence sul scomenz di corse de "Auta Formazion" per insegnanc de la scola de Fascia, strument nezesèr per slarièr fora e renforzèr la cognoscenzes arjontes te due chise egn de lurier.

Tinùltima vegnarà prejentà la ativitèdes del Museo Ladin, col smaorament de la "sezions sul teritorie", ampò te la prospetiva de n

smendrament del temp de l'orario per la jent de la Senta Zentrèla, per via di cosè de gestion: n pont doous, che va de contra respet la domana de proponetes per la bassa sajon che vegn fat scialdi più da spes tel turism fascian, e che tel binomie "cultura e identità" podessa troèr n element che lo caraterisea e califichea.

Fora per dut l domarena del vender se podarà vjitàr debant l Museo e se podarà comprèr desvaliva publicazions de l'Istitut a n priese rebassà.

Te chesta ocasion vegnarà prejentà ence l Calandèr ladin 2018, stampà de gra al sostegn tant de la Coprativa Val de Fascia de Sèn Jan che de chela de Ciampedel: chest an fà per titol "La lum te la ousc del cher" e l propon, tras la fotografies de Emanuela Montrasio e i tesè de Alberta Rossi, n percors singolèr per descorigr più da vejìn la realtà de nesc veies e de si mond. L nef calandèr vegnarà prejentà ofizialmenter a la fin de la radunanza, da les 17.00, aló da la Cèsa de Paussa de Fascia.

L'Istitut envia de cher duta la comunanza a tor pèrt a la Radunanza generèla e a la prezentazion del Calandèr ladin e a dèr so contribut a la discusion con propostes e consees.



Tel cors de la Radunanza vegn prejentà ence l nef numer de Mondo Ladino.



L Calandèr Ladin 2018, fat da l'ICL en colaborazion con l'APSP de Fascia e l sostegn de la Coprativa de Fascia e de Ciampedel, à de bie retrac de Emanuela Montrasio e tesè de Alberta Rossi.